

REGIONAL NEWS

HEADLINES:-

1. Naktuk zing dar 8 atanga Lok Sabha inthlan vote chhiar turin Mizoram ah inpuahchahna peihfel vek a ni tawh .
2. May Ni 28 - a Cyclone Remal kaihhnawih leiminin a hnawl, an ruang la hmuh lohte Central YMA huaihawt-a zawn ni 7-na vawiin khan khar a ni.
3. Chief Election Commissioner Rajiv Kumar-a chuan Lok Sabha inthlan neih zawh takah khan India chuan World record siamin voter vaibelchhe 64.2 in vote an thlak a ti.
4. Syria-a Aleppo hmarlam province ah Israel sipai ten thlawhna hmangin Iran lamtang hel 12 an kaphlum

<><><>

ELECTION PREPAREDNESS

Naktuka Lok Sabha inthlan vote chhiar turin Mizoram ah inpuahchahna peihfel vek a ni tawh a, naktuk zing dar 8 atangin state pumah vote chhiar ÷an a ni dawn a ni.

Aizawl DC Pi Nazuk Kumar-i chuan, tun parliament inthlanpuia Returning Officer chuan zing dar 5 ah vote chhiar tur te duty na tur siksawi fel a ni dawn a ti a. Vote chhiar hi zing dar 8-ah tan a ni dawn a, vote chhiar atana ECI in Counting Observer 16-a ruat te pawh an rawn thleng kim tawh tih sawiin Counting Observer te hi Aizawl ah 5, Lunglei ah 2 leh district dangah pakhat theuh in a duty dawn a ni a ti.

Aizawl DC chuan Vote hi round thum ah chhiar a ni dawn a ti a, Mizoram pumpui tan ETPBMS 2,656 dawn niin Postal ballot-ah 2,107 dawn a ni tawh a ti bawk.

<><><>

COUNTING PROMO

Naktuk Lok Sabha inthlan vote chhiar pualin Akashvani Aizawl chuan Special Election Broadcast a ruahman a.

Naktuk, Lok Sabha vote chhiar niah hian zing dar 7 leh a chanve, zing dar 9 leh minute 55 leh dar 11 leh minute 50-ah te chanchinthar chhiar a ni ang a. Chawhnu lamah dar 1 leh minute 50 bakah tlai dar 6 leh a chanve-ah te chhiar a ni bawk ang.

Lok Sabha inthlan result live-a sawihona hun chu tlai dar 3 atanga dar 4 leh, tlai dar 5 leh minute 20 atanga dar 6 thleng mithiam sawm ten an hmang dawn bawk a ni.

Akashvani Delhi-ah pawh Special Bullet leh Live Discussion chu zing dar 7 atangin zan dar 10 thleng a awm dawn a ni.

<><><>

CM

Chief Minister Pu Lalduhoma hovin CM Conference Hall-ah Zoram Medical College tihmasawn zel dan tur vawiin khan rel a ni.

Chief Minister chuan tunhnaia ruah leh thlipui vanga ZMC in harsatna a tawk chu pawl a tih thu a sawi a. Engkim tluang taka a kal leh thuai theih nan theihtawp a lo chhuahpui thu leh vawiin thlenga a ngaihven zui reng thu a sawi a.

ZMC thawktute pawhin, Disaster Management & Rehabilitation department leh department dangten ZMC harsatna tawh te chu an umzui tha hle tih Chief Minister hi an hrilh a ni.

He thutkhawmah hian National Medical Council endikna an hmachhawn mek dan te, online inspection leh CCTV inspection a kal mek thute tarlan a ni a. ZMC behchhan Helipad leh Fire Station siam thuai chungchang te pawh an sawi a. ZMC hnathawktu, society hnuiaia lak te leh Mizoram sawrkar hnuiaia lakte felfai zawka enkawl dan tur pawh sawiin; kum 2019 a a zirchiangtu Committee in report an lo siam tawh te sawi lan a ni a. ZMC thawktute hi Mizoram sawrkar hnuiaia lakluh vek thain vawiin thutkhawm chuan a hria a. Council of Minister thuneihna a nih avangin Council of Ministers a ngaihtuah tura thlen ni se, tiin an rel a ni.

Vawiin thutkhawmah hian Health Minister Pi Lalrinpuii leh ZMC hotute bakah Finance, DP&AR, Health & Family Welfare leh Law & Judicial hotute an tel a ni.

<><><>

CYCLONE VICTIM SEARCH OPERATION ENDED

May Ni 28 - a Cyclone Remal kaihhnawih leiminin a hnawl, an ruang la hmuh lohte zawn beihpui Central YMA huaihawt-a neih chu ni 7 a tlin tawh avangin hnatlaga zawn hna vawiin atangin chawlhsan a ni.

Central YMA ruahman angin ruang la hmuhlohte hi vawiin khan zawn chhonzawm a ni a. Vawiin bikah Aizawl khawpui chung leh a chhevela YMA Branch 20 chu Central YMA ruahmannain an hnatlang leh a, Vawiin lamah hian a nawlpuia zawn hi ni sarh a tlin tawh avangin tlai Dar 4 khan khar a ni.

May Ni 28 - a Cyclone Remal in a thlen ruah sur nasa avanga leiminin a hnawl zingah hian ruang 29 hmuh ani tawh a, La hmuh loh zingah hian naute thla 6 mi, naupang kum 8 mi leh kum 11 mi te an tel a. Aibawk ami nupa-a leiminin a hnawl mipa kum 42 bakah hnam dang pakhat a tel a ni.

<><><>

GRAFT CASE SENTENCE

Aizawl a Special Court (Prevention of Corruption) chuan dik lo taka mipui sum hmanga puh Chakma Autonomous District Council (CADC) a chairman hlui leh a fapa bakah deputy chairman hlui te chu thiamloh chantirin, kum 4 Jail tang tur leh cheng nuai 3 theuh chawi turin a hrem.

Special judge Dr. HTC Lalrinchhana chuan CADC chairman hlui Kali Kumar Tongchangya, a fapa Julius Tongchangya leh deputy chairman hlui Purna Muni Chakma te hi Zirtawpni khan eiruk thubuai-ah thiam loh a lo chantir tawh a. Vawiiina hremna tihchhuah ah cheng nuai 3 chawi tur leh kum 4 chung Jail tang turin a hrem a, pawisa chawi tur hi an pe theilo anih chuan thla 9 dang an tan belh dawn a, vawiiinah Jail lama hruai nghal an ni.

Kali Kumar Tongchangya hi CADC chairman a nih lai a dan kalha a fapa Julius Tongchangya hna a thun bakah a hlawkna tura thil dik lo taka ti a puh a ni a. Heta hmanraw tangkai tak Purna Muni Chakma leh dik lo taka mipui sum ama

mimal hlawkna atana hmangtu Julius Tongchangya te chu court hian thiam loh a chantir a ni.

<><><>

SAVE CHITE LUI

Save Chite Lui Coordination Committee chu an chairman Pu Lalduhoma hovin vawiin khan thukhawmin tuihna tihpun dan leh luidunga nungchate venhim dan tur an sawiho.

Thutkhawm ah hian tuihna a pun theihna tur leh bawlhhlawh lut nasa lutuk tihtlem dan tur bakah lui kuang venhim dan tur te leh luia nungchate venhim dan tur te an sawi a. Heng atan hian project duan a, Nodal Department Environment, Forest & Climate Change in bawhzui se tih a ni a, Chite lui pawhtu khawpui chung atanga luanglut luite dangte venhim leh tihthianghlimna lam chu UD & PA lamin bawhzui tih a ni bawk.

Save Chite Lui Comprehensive Action Plan phase I hi an kalpui zo tawh a, phase II angin tunah hian kal chhoh leh mek niin he phase II action plan duangtute hi NERIWALM, Tezpur te an ni.

Mizoram sawrkar chuan The Chite Lui (Prevention and control of water pollution) Act, 2018 a lo pass tawh a. Chu dan chuan khauh takin Chite lui hi a humhalh a. He lui tibawlhhlawhtute hi Warrant tel kher lova man theih annih bakah bail dil theihloh an ni a. Sawrkar department ten an lo tibawlhhlawh a nih chuan chu department a head chu a mawhphurtua ngaih tur a ni.

<><><>

AMC

Aizawl Municipal Corporation Ward XIX-na Corporator tur thlanna June ni 25-a neih tur chuh tum te tan hming pekluh theih hun hawn a ni a, He inthlan ah hian chuh tum ten Municipal Returning Officer (Addl. DC Office, Aizawl) ah June ni 6 ral hma in chawhma dar 11:00 leh chawhnu dar 3:00 inkarah Nomination Paper a thehluk theih a ni. Nomination form pawh he office atanga vek hianna lakchhuah theih a ni dawn a ni.

Nomination paper te hi June ni 7 ah endik a ni ang a, inhnukdawkh duh tan June ni 10 chawhnu dar 1 PM ral hma in Addl. DC hnenah thehluk theih a ni dawn a ni.

Vawiin khan state-a rorel lai ZPM President Pu Lalliansawta chuan an party candidate atan Dr C. Malsawmtluangi Hlimen Venglaia cheng chu a puang a, hetihlai hian political party dangin an candidate an la puang lo a, Aizawl Municipal Corporation Ward XIX ah hian Tlangnuam, Tlangnuam Vengthar, Kulikawn, Melthum, Hlimen leh Saikhamakawn te an awm a ni.

<><><>

CEC

Chief Election Commissioner Rajiv Kumar-a chuan Lok Sabha inthlan neih zawh takah khan India chuan World record siamin voter vaibelchhe 64.2 in vote an thlak a ti. Vawiina New Delhi-a chanchinbumite kawmin Pu Kumar-a chuan tun tuma vote thlak zat hi G7 ram- US, UK, France, Germany, Italy, Japan leh Canada rama voter belhkhawm aiin a tam a ti a. Kum 2019 inthlanpuiah vote thlak thatna 540-a neih anih laiin kuminah erawh 39 chauh a ni a ti a. Kumin inthlanpuiah khan monitoring team sing 6 sang 8 chuang leh venhimna leh polling duty vaibelchhe 1.5 chuang an awm bawk a ti.

Chief Election Commissioner chuan Lok Sabha inthlan neih zawh takah khan tharum thawhna liantham a thlen hriat a ni lo a ti a. Sum an man zat hi cheng vaibelchhe sing 1 chuang anih thu sawiin kum 2019 inthlan aiin a tam zawk a ti

a. Model Code of Conduct bawhchhiaa inhekna 495 lutah zaa 90 chu chinfel a ni a ti bawk.

<><><>

ISRAEL STRIKES

Syria-a Aleppo hmarlam province ah Israel sipai ten thlawhna hmangin Iran lamtang hel 12 an kaphlum. Syrian Observatory for Human Rights sawidanin hel kahhlum te hi Syrian mi leh hnamdang an ni a, Aleppo khawpui chhehvelah heng hel sipaite hi an chetla tam hle niin a tarlang.

Israel sipai thlawhnate hian Aleppo khaw daia awm Hayyan khua an kap nasa hle a. Tunhnaiah Israel sipaiten Lebanese Hezbollah leh Iranian helten an thunun lai an bitum nasa hle a ni.

<><><>

JAPAN EARTHQUAKE

Vawiin khan Japan-a Noto region-a central prefecture of Ishikawa-ah magnitude 6-a nain lir a nghing. Thudawn danin lirnghin hun hi India sanaa zing dar 6.31 ah niin leihnuai km 14 a thuk atangin a rawn intan a ni.

<><><>